

那文毅公奏議

那文毅公二任陝甘總督奏議卷二十七目錄

卷二十七

糾彈庸劣

那文毅公二任陝甘總督奏議

目錄

那文毅公二任陝甘總督奏議卷二十七

上海市歷史文
獻圖書館藏

男
容安恭輯

糾彈庸劣

嘉慶十六年閏三月十九日

奏爲特叅敗檢濫刑卑鄙無恥之遊擊及隨同挾妓飲
酒之遊擊都司知縣請

旨革職嚴審事竊

臣

上年辦理災賑務期掃除積弊有派

出查賑之文武委員亦恐其與地方官串通舞弊

臣

時刻留心專差密訪茲有署督標叅將鎮夷營

遊擊鳳威經

臣

委赴隴西縣彈壓饑民就近稽查

監散嗣經訪聞鳳威在彼有挾妓飲酒之事並據帶往之兵丁張明蔣柱雒成祿盛得福張國漢雷崇得等回省赴臣衙門喊稟該遊擊曾在署鞏昌營遊擊程永泰衙門喚進娼妓雷富貴子唱曲侍飲隴西縣知縣樊玉軸亦會同席是夜鳳威將雷富貴子帶回公館留宿又兼虐使兵丁曾令兵丁張明做飯該遊擊與娼妓同食因其不好卽將該兵丁用鞋掌責並供出該遊擊曾得過樊玉軸銀三百兩車騾一頭不知是借是送等供臣隨飛提鳳威程永泰樊玉軸及案內人証一併解省督同

藩臬兩司嚴加審訊據程永泰供上年十一月二十四日在本衙門邀請鳳威款待酒飯並邀樊玉軸相陪鳳威酒後央其喚進娼妓雷富貴子唱曲侍飲等情質之雷富貴子亦已承認並供出是夜鳳威卽帶回公館歇宿其因做飯責打兵丁屬實而鳳威尙在混賴又鳳威與樊玉軸同供伊等曾在陝西軍營熟識相好此次鳳威到隴會因天寒向樊玉軸借銀製衣並借盤費共銀三百兩有券可驗臨行又借用車騾並無別故臣查鳳威以遊擊大員奉委災賑重務膽敢挾妓宿娼卑鄙無恥

甚至濫責兵丁尤屬任性狂蕩殊堪痛恨程永泰
邀請宴會與樊玉軸一同挾妓飲酒均屬有玷官
箴且當地方荒歉辦理賑務之時文武官員尙復
不恤民事蕩檢踰閑其罪更難輕縱至鳳威向樊
玉軸借貸銀兩車驟一節更關緊要雖借銀有券
是否實係借貸抑係藉端需索及樊玉軸有無交
結委員於賑務中串通滋弊之處必須徹底根究
嚴懲示儆臣已飭委蘭州道嚴煇馳往隴西弔查
該縣散過賑冊親赴四鄉按照戶口逐一核對有
無浮冒歸案審辦外茲據藩臬兩司轉據該管道

府揭報前來相應恭摺奏

奏請

旨將鎮夷營遊擊鳳威署鞏昌營遊擊臨洮營都司程永
泰隴西縣知縣樊玉軸一併革職收禁以便提同
案內人証嚴加刑訊定擬具奏並委員前赴隴西
縣摘印署理並將樊玉軸經手倉庫錢糧有無未
清查查明另辦謹

奏

嘉慶十六年四月初八日奉

上諭據那彥成奏遊擊鳳威委查賑務在署鞏昌營遊擊

都司程永泰署內挾妓飲酒並向隴西縣知縣樊玉軸借用銀兩車驟卑鄙無恥請旨革審一摺遊擊鳳威都司程永泰知縣樊玉軸著一併革職交該督提集人証嚴審定擬具奏

嘉慶十六年五月十五日

奏爲遵

旨審明定擬恭摺覆

奏事竊

臣

奏奉 聖 旨 營遊擊鳳威委查賑務在署鞫昌

營遊擊程永泰署內挾妓飲酒並向隴西縣知縣

樊玉軸借用銀兩車驟一案奉

旨鳳威樊玉軸程永泰著一併革職交臣提集人証嚴審

定擬具奏欽此當卽行司傷委署蘭州府知府稽

承裕逐款嚴訊山藩司陳祁臬司積朗阿蘭州道

嚴煇審擬解勘前來臣親提覆鞫緣已革鎮夷營

遊擊鳳威與署鞏昌營遊擊臨洮營都司程永泰

同官熟識並與隴西縣知縣樊玉軸前在漢中軍

營素稱交好嘉慶十五年十月內隴西地方放賑

鳳威奉委前往監查彈壓十一月二十日至各鄉

監散賑銀事竣回縣二十四日程永泰邀請鳳威

至署款待酒飯并邀樊玉軸作陪鳳威赴飲時見

有在街賣唱之娼妓雷富貴子卽先至樊玉軸署
內商同於赴席時喚至取樂旋至程永泰署中同
樊玉軸商之程永泰程永泰荅以此地並無唱曲
女子用言阻止旋因有文書簽押避席進內鳳威
樊玉軸隨令巡兵王源將雷富貴子徑行喚進在
席唱曲程永泰見而生怒卽將巡兵王源當場責
革樊玉軸含愧辭回鳳威氣忿聲言不須臊我我
自帶回寓中自行取樂隨將雷富貴子帶回伴宿
賞給錢文次日令跟隨兵丁張明做飯與雷富貴
子同食因不適口遂將張明賞責此鳳威在隴宿

娼虐責兵丁及樊玉軸隨同挾妓飲酒之原委也
迨十一月杪鳳威因天氣寒冷需製皮衣隨從弁
兵亦需衣履盤費向鳳威公同求借鳳威隨向樊
玉軸商借銀三百兩寫立借券約定回省寄還樊
玉軸因平日交好情不可却當卽收券照數借給
鳳威將銀轉借隨帶之本營兵丁張明等六名每
名銀八兩又借與隨往之把總張仁外委薛漣兵
丁紀棟裴順等四名每名銀一十五兩餘銀一百
九十二兩留爲自用嗣緣騎馬倒斃又向樊玉軸
借用騾頭旋因買馬將騾送還此又鳳威借銀借

驟之實在情節也迨後事竣回省兵丁張明等旋
回鎮夷鳳威因慮路遠難扣餉銀勒令將所借銀
兩就省繳還張明等一時無措鳳威加以責罵張
明等心懷不甘赴臣衙門喊稟當經叅

奏革審所有鳳威挾妓宿娼虐使兵丁各款已據供認
確鑿惟於奉委查賑事務輒向知縣借貸該縣又
卽照數借應情節可疑恐有串通侵蝕賑銀及挾
制需索之事復將該革員等撥刑嚇訊據供隴西
縣賑銀係照戶口數册由縣攤募兌封資呈木管
道府按封查驗另行委員押運赴鄉會同散放並

非知縣一人經手無從侵蝕鳳威隨同監散目覩
清真亦斷不能起意需索質之弁兵僉供實因天
寒衣薄再三求借是以鳳威始向樊玉軸通挪並
無別故等情查此案臣前經

奏明飭委蘭州道嚴烜馳赴隴西弔查散過賑冊按戶
核對嗣據該道稟覆帶同委員親赴該縣各鄉按
戶抽查所放銀數均屬相符詢之該管道府俱稱
此項賑銀由縣攤剪兌封呈驗明白由道府委員
散放該縣並未經手實屬無從侵冒等語復經該
道嚴烜傳集攤剪之銀錢舖戶說明是實查隴西

縣實放賑銀二萬四千一百一十一兩零其餘逃
荒未回及臨點不到各戶餘剩銀兩已於二月二
十九日批解司庫有藩司庫收批迴可據復查無
異又提到鳳威所給樊玉軸借券查驗屬實是樊
玉軸所借鳳威銀兩止係交好通融與賑務並無
干涉似屬可信查律載官吏宿娼杖六十挾妓飲
酒亦同此律此案已革鎮夷營遊擊鳳威私役在
營兵丁令其充當厨役做飯已屬違例甚至飲酒
宿娼虐責兵丁尤屬卑鄙無恥任性狂蕩已革隴
西縣知縣樊玉軸辦理賑務不恤民事既不驅逐

流娼復借同鳳威挾妓飲酒實屬有玷官箴鳳威
樊玉軸若僅照官吏宿娼挾妓飲酒律定擬實覺
情重法輕業經革職應請

旨一併發往伊犁充當苦差以示懲儆署鞏昌營遊擊臨
洮營都司程永泰因鳳威係屬過客款待酒飯尙
與無故宴會者不同當鳳威等欲喚雷富貴子之
時用言阻止旋因公事避席不及攔阻當將傳喚
之兵丁責革致鳳威等無顏終席各自散去是程
永泰尙知守正惟僅將兵丁責革並不據實揭報
究屬應申不申程永泰業經革職應請

皇上施恩准予開復仍交部照例議處兵丁王源聽從傳
喚妓女帶進衙署實屬不合業經責革應免重科
兵丁張明等六名俱係鳳威私役因被本官責罵
勒還借項以致情急喊稟且所稟得實尙無不合
應與無干之把總張仁外委薛漣兵丁紀棟裴順
等俱免置議張仁薛漣所借銀兩業經歸還張明
等被官私役其與紀棟等所借銀兩俱屬無多概
免著追仍於鳳威名下照數罰追給還樊玉軸收
領掣銷借券娼妓雷富貴子應照犯姦例杖一百
枷號一個月杖決枷臍遞回原籍查傳親屬收領

所得鳳威錢文照追入官帶領雷富貴子沿途賣
唱之張升獲日另結容留娼妓之房主及失察牌
甲人等照例責處無干省釋謹

奏

嘉慶十六年六月初六日奉

上諭那彥成奏審出已革遊擊鳳威等飲酒宿娼並索借
銀兩各實情定擬罪名請勅部核覆一摺鳳威係遊擊
大員奉委查賑因都司程永泰邀請赴席輒敢傳喚娼
妓唱曲侑酒隨又帶回伴宿並向知縣樊玉軸索借銀
三百兩種種卑鄙不堪無恥已極鳳威著卽發往伊犁

充當苦差到戍後加枷號半年以示懲儆樊玉軸協同
挾妓飲酒亦屬無恥著一併發往伊犁充當苦差程永
泰與鳳威係屬舊交其查賑到彼款待酒飯鳳威商令
喚妓會用言阻止迨兵丁聽從鳳威喚入娼妓伊先因
公事避席進內並不知情及至見面根究卽將該兵丁
當場責革雖未經揭報例有應申不申之咎但該員能
知持正畏法自當格外施恩程永泰著卽予開復所有
該督擬請交部議處之處著加恩寬免餘俱照所議完
結毋庸再交部議

嘉慶十六年閏三月十九日

奏爲查出散賑滋弊之委員及刑賄捏冒復行主謀奪犯之刁生分別嚴審定擬事竊照甘省上年辦理災賑臣履遵

諭旨督率司道酌派委員協同地方文武認真散放猶恐積弊難除節經諄囑各道府隨時嚴密查報去後嗣據署平慶涇道德克精阿固原州知州李堯詢稟稱上年九月十二日該州散賑至萬新營地方訪得鄉約白玉文生白淑通有賄囑委員未入流王維翰冒領賑票之事當將白玉拘到派差在店鎖押候訊詎白淑通糾聚將白玉奪去隨經會營

追獲并奪犯之高蘭任占時白子高崔科劉添發

白輝宗馬生儉等七名訊出前情白淑通現在逃

避無獲業已飭學詳革等語臣隨飛飭嚴拏解省

審辦於本年三月初二日始將白淑通拏獲同全

案犯証解到行據藩司陳祁臬司積朗阿督同委

員蘭州府知府楊祖淳撫彝通判延桂等審擬解

勘前來臣親提覆鞫緣試用未入流王維翰於嘉

慶十五年八月經平慶涇道委赴固原東鄉查放

初賑照票該員逐莊點放尙無他弊九月間查至

萬安監地方有文生白淑通鄉約白玉馬生儉民

人高蘭任占時白子高崔科劉添發白輝宗等在
彼等候點查白淑通起意捏造戶口底冊冒領賑
銀當與白玉等商允隨迎接王維翰告以該處地
方遼濶若挨戶細查災民不得早領銀兩求照鄉
約原造底冊給發賑票鄉約亦免守候賠累情愿
奏送盤費等語王維翰因該處荒歉夫馬食料昂
貴所領公費不敷當卽應允白淑通隨令白玉等
照依保甲開明戶口將逃戶一併列入捏就底冊
共奏辦市平紋銀八十兩餽送王維翰市平紋銀
五十兩折實庫平銀四十七兩九錢又給戶書龔

治江程坦市平銀各十兩每人折實銀九兩五錢
八分跟役楊明庫劉升市平銀各五兩每人折實
銀四兩七錢王維翰卽照所呈底冊發給賑票計
該犯等捏票六百四十張共應銀二百五十二兩
二錢零白淑通議定俟領銀後除去使費餘銀九
股均分九月十二日該州李堯詢赴萬新營放賑
途次訪出前項情弊立即追回賑票將鄉約白玉
拘獲派役張升李德在店鎖押候訊白淑通聞知
破案恐白玉供出問罪起意奪犯令其逃走滅口
當與高蘭等商允十三日早主使高蘭等七人擁

至店房將白玉及伴役李德一併搶出隨將白玉
項上鎖練砸斷令其逃匿該犯等均卽跑散經州
役張升李德報州會營隨將該犯等一併拏獲提
省審訊不諱臣查白淑通等既經捏造灾戶恐不
止六百四十戶之數王維翰從中是否扶同捏造
串弊分肥不可不徹底根究其得受盤費亦恐不
止四十七兩有零且白淑通既已主謀奪犯難保
無聚眾毆差之事嚴加刑訊矢口不移似無遁飾
此案白淑通身列膠庠膽敢起意捏造戶口冒領
賑銀商同白玉等賄求委員照冊發票已屬不法

乃因白玉被拏復主使高蘭等奪回更屬目無法
紀未便因其並未毆差稍爲寬縱白淑通除以財
行求罪止杖徒輕罪不議外合依官司差人捕獲
罪人但經聚衆奪犯雖未傷人首犯亦照因而傷
人律從重擬絞例擬絞監候秋後處決王維翰以
候補人員奉委查辦賑務照例支給公費乃聽信
白淑通慫恿並不點查戶口濫給賑票幾被冒領
賑銀雖訛無商同扶捏分肥情事而受賄發票實
屬枉法應照有祿人科斷除隨從書役得受銀兩
訛不知情各科各罪不議外王維翰得受贓銀四

十七兩九錢應照受枉法贓四十五兩杖一百流
二千里律擬杖一百流二千里革職發配但該員
係災賑得贓且因其得贓給票幾至刁民聚衆生
事應請

旨發往伊犁充當苦差以示懲戒高蘭任占時白子高崔
科劉添發白輝宗馬生儉均聽從白淑通主使奪
犯係屬爲從應仍照律坐罪高蘭等七犯均合依
官司差人捕獲罪人聚衆中途打奪首犯杖一百
流三千里爲從減一等律各杖一百徒三年白玉
猝被該犯搶奪訛不知情且因未及投首卽被擊

獲應仍照行求爲從無祿人減二等例於王維翰杖一百流二千里上減二等擬杖九十徒二年半以上擬徒各犯均到配折責安置書吏龔治江程坦各得銀九兩五錢八分跟役楊明庫劉升各得銀四兩七錢均應照受枉法贓一兩至五兩杖八十律杖八十俱係無祿人應減一等楊明庫劉升應各杖七十龔治江程坦係書吏知法犯法應加一等仍各杖八十以上擬杖各犯均照例折責分別革役發落伴役張升李德畏衆未敢攔阻犯已全獲請免置議王維翰等所得贓銀俱照追入官

跟役劉升緝獲另結劉添發白輝宗是否親老丁
單應否留養查明另辦無干省釋再此案因首犯
白淑通甫經緝獲是以辦理稍遲謹

奏奉

硃批刑部速議具奏

嘉慶十六年閏三月十九日

奏上年辦理賑務各屬災民均皆安靜無事惟固原鹽
茶安定會寧一帶間有饑民聚眾搶奪及阻擋委
員查戶散票必欲照其虛報戶口領賑而後止因
念究係饑民且人數無多隨各嚴拏懲治辦理惟

其中固原鹽茶二屬漢回雜處民情刁悍倍常此風尤甚復查上年賑務仰蒙

恩旨發帑施仁矜全無算

臣稟遵

訓諭痛除積弊各文武少知自愛者亦無不盡心襄辦小弊雖未能盡除自問亦稍可以對此災民乃固原州屬尚有刁生白淑通賄囑委員捏領賑票之事竊思鄉民捏報戶口不過希圖多領銀糧尙屬常情至於聚眾奪犯目無法紀實爲地方之大害况白淑通身係文生膽敢起意冒賑又復主謀糾眾奪犯情罪較重又兼在固原鹽茶積悍難治之區

尤不可不嚴示創懲現在問擬絞候係照本律定
罪秋審入於情實自必奉

旨予勾惟距行刑尙早該處民人未能卽時觸目儆心於
地方仍爲無益白淑通一犯應請

旨卽行辦理以儆刁惡而靖地方其聽從奪犯之高蘭任
占時白丁高崔科馬生儉劉添發白輝宗等七名
究係從犯仍各照本律治罪以示區別之處出自
聖恩臣爲整頓地方起見謹

奏奉

硃批所奏是

嘉慶十六年十二月初三日

奏爲遵

旨審明定擬恭摺覆

奏事准署督臣董教增移交准步軍統領衙門咨稱盤
獲欲行告狀之秦州民人馮登旺託係欲控李州
判折價浮收糧石一案奏明奉

旨此案著交該督那彥成親提嚴審定擬具奏並將該州
判李姓查明解任質託原告馮登旺該部解往備質欽
此旋准刑部於本年八月初六日將馮登旺解到
查明秦州州判李姓係李世青當經董教增飭令

解任并提案內人証解省質訛案証于八月十五日到齊隨即督同兩司審訊茲據游司積朗阿署臬司嚴煇委員蘭州府知府楊祖淳鞏昌府知府孫鵬儀臯蘭縣知縣丁聞洲等審擬解勘前來臣親提覆鞠緣馮登旺籍隸秦州三岔居住馮家川地方該處分防州判李世青因嘉慶十四年秋收歉薄於十五年正月詳准出借籽種豌豆六百三十石零按畝散放計馮家川農民二十三戶共應借糧二石二斗馮登旺名下應領糧一斗該州判以向來花戶借糧多有拖欠當即傳諭責成鄉約

經手總領總完如完不足數卽向鄉約追比各花
戶俱各允從嗣鄉約郭世德領出糧二石二斗其
時月報豌豆一石值銀一兩五錢七分每兩易錢
九百三十文共合錢一千四百六十文郭世德以
現在糧貴秋收後價必遞減起意按照例價放給
折色秋後收價買糧代納出入可得盈餘遂將領
出糧石糶賣惟因倉糧較陳每石僅糶錢一千三
百文共錢二千八百六十文除歸例價二兩二錢
合錢二千四十六文外餘剩錢八百十四文留爲
盤費使用及至到鄉聲言本年籽種係放折色每

斗放錢九十三文戶民馮有才等俱各照數收領
因郭世德進城代勞每斗又攤出錢十文共奏給
錢二百二十文以爲飯食雜時馮登旺外出其名
下應領糧一斗郭世德亦僅給伊子馮狗娃錢八
十三文是年秋間三岔毗連災地糧價日昂豌豆
每石值銀一兩六錢每兩易錢一千文共合錢一
千六百文而各戶民因春間借糧係領折色是以
卽照例價每斗出錢一百共錢二千二百文仍交
郭世德代納郭世德無可置辯適州判差役何順
前赴催領郭世德將前後情節告知商同何順捏

稱奉有官諭現因豌豆缺乏兵糧緊要令將借糧仍完本色各戶民因照市價每斗添出錢六十文央其代買代完郭世德等旋即掣出糧串赴鄉分給並開出盤費腳價錢一千六百五十文令眾人攤還彼此嚷鬧各戶又每斗攤出錢七十五文交與郭世德何順收受分用馮狗娃亦隨衆找付前後共給過一斗糧錢二百三十五文屬實嗣馮登旺回家聞知心疑該州判有折色淨收情事又值該處搭蓋橋梁向係每戶交草二十束與鄉約經理管修理馮登旺彼時無草郭世德折算錢一百文

馮登旺嫌多口角郭世德以不怕稟官之語回荅
馮登旺又疑折收草價係由本官授意旋經衆戶
核算並無多收馮登旺亦卽照數交錢而散迨本
年春間該州判詳准出借農民口糧折色銀六百
三十八兩馮家川戶民聞知又恐完納多費俱不
願領經鄉約稟官卽行扣除未散並無差役捕拏
花戶勒令領糧之事適上年九月馮登旺有赴陝
西鳳翔府呈控劉萬年爭種伊姪馮義山地一案
該府批行隴州審訊馮登旺臨審脫逃關提原籍
本年三月經該州判差役張士安協同鄉約查傳

該役等攜帶鎖練下鄉馮登旺詢知關傳情由慮
恐到案受累旋卽逃至徽縣傭工有山西脚戶曹
姓僱令趕騾至京在街游蕩經步軍校盤詰馮登
旺不敢說出畏審潛逃緣由隨以欲告李州判之
事向荅經步軍統領衙門訊供請

旨解甘質訊提案審認不諱臣誠恐鄉約人等此外尙有

收放侵漁及該州判通同染指事後串捏卸罪情
弊復行司飭提該衙門上年流水串根冊籍逐一
核對委係以本色實放實收其責成各鄉約總領
總完亦屬實情是李世青尙無勒折淨收之弊惟

飭據署秦州知州延桂查報三畝此外各莊鄉約
王典王有成張子學等亦有將總領糧石糶賣俱
照例價散錢侵用盈餘之事迨秋徵糧貴慮恐告
發除收回各戶例價外隨各自措錢文湊買本色
完倉不但不得侵吞反多賠累又鄉約劉盈科趙
大倫奈付成等代領糧石轉放花戶每石扣糧五
升作爲盤費自一石餘至五石餘不等此外各鄉
約收放別無滋弊復提王典等訛供無異自應併
案定擬以成信讞查律載攬納稅糧律註侵費正
數及多科費用以誑騙論又誑騙人財物計贓准

竊盜論又竊盜贓一兩以上至一十兩杖七十又律載竊役索詐貧民計贓一兩以下杖一百一兩至五兩杖一百加枷號一個月又律載告人二罪以上重事告實輕事招虛免罪又律載不應爲而爲之事理重者杖八十又例載告言人罪一經批准原告不卽赴審輒行脫逃兩月不到案者將所告之事不與審理拏獲原告專治以証吉之罪各等語此案鄉約郭世德因本官令將借放籽種總領總完輒敢從中舞弊捏稱散放折色旣侵正數復受飯錢嗣因完糧價貴復又商同糧差何順捏

傳官諭仍令各戶完交本色糧價并科費用實屬
玩法郭世德一犯除搭橋折草尙無侵漁以及收
受花戶飯錢各輕罪不議外其先侵糧價八百十
四文并同何順分用所斂費錢八百二十五文共
折銀一兩六錢四分若以誑騙定擬尙屬情浮於
法應照蠹役詐贓一兩至五兩例杖一百加枷號
一個月革役滿日折責發落糧差何順聽從郭世
德捏傳官諭復又商同斂費分用贓錢八百二十
五文計銀在一兩以下應照例杖一百革役折責
發落馮登旺誤控州判折價淨收究由該鄉約郭

世德等舞弊所致是所控重事既已得實其餘控
虛各款應照律免罪惟在京被獲時不將畏審潛
逃實情供吐實屬狡詐但並未投遞呈詞詰無包
攬告狀情事亦非越訴可比應照不應重律杖八
十至該犯先在鳳翔府呈控劉萬年一案若非情
虛何以臨審脫逃應將該犯解往隴州質訊如係
虛誣或坐誣之罪較重卽從其重者辦理又鄉約
王典等亦有捏放折色侵漁情事雖已照數交出
究係先侵後吐仍應與侵扣糧石之鄉約劉盈科
等計贓定罪查王典王有成張子學劉盈科趙大

倫余付成各名下所得贓銀自一兩至八兩餘不
等均照竊盜贓一兩至十兩律各杖七十革役折
責發落各該犯侵扣糧價及所徵費錢等項照數
追出分別入官給主承領馮家川花戶馮有才等
因奉官諭將糧交給鄉約領納卽奏送飯錢亦因
其代勞所致情尙可原應與此外被鄉約折扣之
各莊花戶均免置議衙役張士安奉票傳人訊無
持械捕拏之事亦毋庸議州判李世青散放借糧
因恐花戶拖欠輒違例假手鄉約總領總完致郭
世德等藉端滋弊以便民之政轉爲累民之舉雖

訛無通同染指情事實屬辦理錯謬不恤民瘼相
應附奏請

旨將秦州直隸州三岔州判李世青照溺職例革職以示
懲儆嗣後散放借糧飭令各花戶自行領納毋須
假手官役及該處橋工亦令官爲捐修不准鄉約
涉手累及間閭謹

奏奉

硃批該部議奏

嘉慶十七年十月初八日

奏爲查明借差包攬騷擾驛站司員請

旨扣留甘省查審辦理以清驛站事據署甘肅臬司蘇成
額稟稱准鞫秦階道暨永昌協會同咨稱本年後
藏班禪額爾德呢

貢使堪布巴爾丹策淋隨帶皮包並跟役二十九名到
西寧地方公同查驗所帶正餘各包共一千一百
一個蒙青海大臣福克精阿驗明准令該堪布將
例外餘包帶往蘭州西安一帶銷售使用等情於
九月二十八日到蘭隨派署臯蘭縣知縣李醇和
前往點查除喇嘛正餘包二千一百零一個外又
查出包一百零九個詢據通事供稱係員外郎奇

福主事岱清阿所帶是否包攬奸商夾帶抑係該員等私帶之物均不可不徹底根究稟請叅辦前來臣覆查堪布所帶包物向有一定章程前准福克精阿札稱此次堪布喇嘛到寧正餘包數過多卽欲截留奏辦嗣因該堪布畏懼叩懇將正餘各包遵照定數進京其多帶之包情愿出具甘結在蘭州西安等處銷售開作沿途使用因此從權催令起行前進臣以前後藏喇嘛每年入

覲其意甚誠其名甚正仰蒙

聖恩優加體恤厚往薄來該堪布等初入內地或順帶土

宜分送京中各喇嘛以作人情或隨置貨物藉圖微利爲沿途使用亦屬若輩見小之常態若遽因例外多帶餘包卽事截留礙難辦理似無以示

聖朝寬大之恩是以

臣

一面分飭西路地方官暫爲通融

應付俟到蘭再爲辦理今據署臬司查明正餘各包一千一百一個之外復有一百零九個詢係護送之司員所帶實堪駭異向來西藏喇嘛與回子伯克等年班有多帶包物俱係例准自行僱運卽有時通融捐辦報部時仍按例報銷悉皆仰體

皇上柔遠綏來之意從權辦理至護送之委員乘勢違例

私帶非外夷無知可比實難姑容查奇福係理藩院原派委員岱清阿係福克精阿因奇福患病添派之員乃敢恣意多帶包物疲勞驛站若不嚴叅究辦將來新疆往來之員人人效尤成何政體相應據實叅奏請

旨將員外郎奇福委署主事岱清阿扣留甘省以便嚴審定擬以示懲儆臣一面將該司員等叅奏截留將所帶之行李物件盡行抄錄俟審明再行照例辦理一面卽派委新任甘涼道容海押送喇嘛進京至理藩院交替後卽可回任將來該堪布自京回

藏仍由理藩院照例派員押送至於該堪布例外
多帶之包所稱沿途銷售實所難行臣仍嚴飭查
照向例餘包准帶聽其自行僱運惟其人地生疎
難免遲滯臣密告容海一路加意察看該堪布如
實不能僱運只好設法量爲接濟總令知

天朝法度森嚴仍於體恤之中示之節制應並行知駐藏
及西寧辦事大臣下次堪布進京時務須嚴查飭
禁不可多帶餘包致滋騷擾謹

奏

嘉慶十七年十月二十五日奉

上諭那彥成叅奏借差包攬騷擾驛站之司員請旨革審
一摺向來喇嘛入貢其堪布等進京隨帶貨物均有一
定例額尙不在此外多帶至護送官員尤應奉公守法
以爲倡率今員外郎奇福主事岱清阿私帶貨物一百
餘包非自置牟利卽係包攬夾帶均應確實根究奇福
岱清阿著革職交那彥成嚴審治罪其所帶貨物均變
價入官

嘉慶十七年十二月初五日

奏爲遵

旨審明定擬恭摺覆奏事竊臣叅奏護送喇嘛之員外郎

奇福等藉差包攬騷擾驛站一案欽奉

上諭向來喇嘛入貢其堪布等進京隨帶貨物均有一定例額不准例外多帶至護送官員尤應奉公守法以爲倡率今員外郎奇福主事岱清阿私帶貨物一百餘包非自置牟利卽係包攬夾帶均應確實根究奇福岱清阿革職交臣嚴審治罪其所帶貨物均著變價入官欽此臣等卽督同署藩臬兩司親提研鞫緣本年後藏堪布巴爾丹策淋隨帶皮包並跟役通事黑人等行至西寧地方經西寧辦事大臣福克精阿派員秤驗該堪布於例准正餘包六百零一個之外

多帶包五百個卽飭令西寧縣照數備車拉送維
時福克精阿因理藩院派出護送之員外郎奇福
患病頗重隨添派委署主事岱清阿幫同押送照
料岱清阿遂將自己行李皮包大小六個搭入堪
布包車通事隆珠丹怎帶有藏香六包亦混入車
內正在起行而跟隨堪布之黑人等又將私帶貨
物行李共包九十七個因人地生疎難以僱覓車
輛隨奏出腳價銀一百八十兩交給通事懇求員
外郎奇福代爲僱車拉運經奇福應允代僱乃該
員將車價一百八十兩乾沒入己並未代僱車輛

私將黑人之包九十七個混入包內搭運又奇福家人沈五兒傅升董升乘勢刁勒黑人等奏銀十七兩送給沈五兒等將銀均分此跟隨堪布之通事黑人並岱清阿自西盜夾帶包物以及員外郎奇福乾沒腳價夾帶行走之寶在情形也迨至蘭城署臬司蘇成額委員查出堪布所帶包物一千一百零一個之外尙多一百零九個備由具稟前來經臣一面叅奏請

旨將該員等扣留審辦一面飭令該署臬司會同署藩司德克精阿將多帶包物當衆折驗內奇福私攬之

包均係藏香氈毯及喇嘛衣服食用等件而岱清阿所帶大小包六個內係行李衣服並無貨物並傳奇福岱清阿及家人沈五兒等與通事黑人一質訊始據各供前情不諱詰無包攬奸商貨物私帶情事臣查向來堪布多帶包物例准其自行僱馱裝運此次黑人等多帶之包已自出已資懇求奇福代僱與例尙無不合自應將所帶包物全數給還並於奇福名下追出車價給領飭令自行僱運車輛前進訖嗣據臬蘭縣報稱員外郎奇福於十一月初一日在店調治不愈因病身故旋於

十一月十四日欽奉

諭旨交

臣

審辦遵卽復提岱清阿再行研訊確情據供實

只帶行李包六個其多餘之一百零三個實是通
事黑人交給奇福夾帶伊怎樣收受腳價我並不
知情奇福寫有供詞只求查問伊家人等就知道
了惟我知奇福替黑人包帶並不稟出實是我的
不是等供又據沈五兒傅升董升同供通事央懇
本官奇福夾帶黑人包物並收受車價及小的們
得受銀十七兩都是實情並無包攬奸商夾帶貨
物情事反覆究詰案無遁飾查律載凡官吏受財

者計贓科斷枉法贓有祿人八十兩絞監候等語
此案員外郎奇福以派出京員私將喇嘛車價乾
沒入己已屬卑鄙不堪冒用官車擾累驛站尤爲
玩法自應照枉法贓有祿人八十兩以上絞監候
律擬絞監候該員業於取供後病故應毋庸議所
得銀兩已追出給領該員行李一併抄沒入官家
人沈五兒傅升董升等因奇福受贓夾帶藉勢索
取黑人等銀共十七兩若照坐贓論罪止笞三十
似覺情浮於法甘省係通衢大道似此扶同擾累
驛站不可不嚴行懲辦應照不應重律杖八十再

加枷號半年在蘭州城門往來大路以示懲儆滿
日折責遞籍所得銀兩照追入官通事隆珠丹怎
亦夾帶包六個亦屬不合現在堪布進京俟回至
甘省之日一併枷號半年示衆至主事岱清阿奉
派幫同護送逐站本有例給馬匹乃任意將其行
李包大小六個裝入堪布車內雖驗係行李尙非
違例夾帶貨物可比惟既知奇福爲黑人夾帶包
物並不據實申報究有不合應請

旨交部議處謹

奏奉

硃批該部議奏

嘉慶十八年正月十八日

奏爲遵

旨覆奏事嘉慶十七年十二月二十六日接奉延寄十二月十三日奉

上諭理藩院奏查明西藏堪布喇嘛多帶餘包請交那彥成再行究審等語此案前經那彥成叅奏護送堪布之司員奇福岱清阿私帶貨物一百餘包當經降旨交那彥成嚴審其所帶貨物著變價入官茲堪布喇嘛等到京經理藩院查點正餘皮包共一千二百零三個較該

督所奏一千一百零一個原數之外多包一百零二個
內餘正項皮包一千一百零一個均係貢件等項照例
辦理外其餘皮包詢據喇嘛等供稱係屬跟役徒衆及
在藏學經之蒙古班第等物件從前未告知堪布自行
央求司員奇福等代爲僱送等語與該督原奏情節亦
復互異此項多帶餘包如果係革員奇福等私帶之物
自應變價入官若實係該喇嘛徒衆等所帶之物未便
一例充公著那彥成卽向奇福等嚴訊所有多條皮包
該革員等或係自行私帶或係包攬商貨自有確數底
簿該督查訊明晰開具清單據實具奏俟奏到時再交

理藩院分別核辦欽此

臣

遵查堪布所帶正餘皮包共

計一千一百零一個之外復多一百零九個詢係

革員奇福等夾帶是以前經叅奏審辦嗣即查明

該革員所帶之包除岱清阿行李包六個外實有

一百零三個均係黑人徒衆及通事等之物從前

未告知堪布自行央求奇福代爲夾帶除查訊明

確將各包物全數給還該黑人等并於奇福名下

追出車價給領令其自行僱運前進並將奇福等

分別定擬於十二月初五日繕摺拜發現在欽奉

硃批該部議奏欽此欽遵在案是

臣

覆奏定擬緣由與理

藩院查訊情節並無互異該黑人多帶之包業經

全數給還亦並未變價入官所有

臣奉到

諭旨理合恭摺覆

奏奉

硃批知道了

嘉慶十七年十一月十四日

奏爲特叅酷刑致斃民命並失察家人書役藉端勒索

庸劣不職之知縣請

旨革職嚴審以肅

功令事竊照知縣一官身膺民社聽訟當以理察不容

任意酷刑而於家人書役尤宜嚴加約束毋使藉端勒索方爲無忝厥職詎秦安縣知縣牟尙仁人本平庸性復躁虐茲據秦州直隸州知州李受曾稟稱緣該縣民人馬得河於嘉慶二年置買地畝遺糧九合本年里長馬奉瀧等查出稟經該縣於八月十九日稟差壯役高廷貴傳訊適馬得河因事進城被該役尋獲令其看票彼此揪扭到官該役自行失手扯損印票恐自己受責隨捏以馬得河逞刁扯票向該縣管門家人李四告知馬得河不服爭辯該縣聽聞出訊馬得河以並未欠糧亦

未批稟訴該縣輒將其掌責三十馬得河恃老
不服又將其打問板小竹篋五十馬得河始認味
精屬實該縣以其隱昧丁糧又杖責二十押追是
晚皂役馮祿等見馬得河年邁受責回明該縣領
出在崔喜才店內過宿每日早間仍提至署鎖押
追糧至二十二日早間馬得河之子馬保才見伊
父被責傷重央託客民王近士轉求門丁李四向
縣稟懇保出調養隨宰羊隻挽王近士與里長算
欠糧賬及款待戶書里役人等又向王廷章借得
大錢十五千文給王近士一千六百文託與里長

清算糧賬被里長馬報均勒要大錢四千文再託王近士轉送門丁李四大錢六千四百李四因馬得河傷重未敢收用又寄存李本寬處大錢三千文爲閱發戶書馮閱基差役高廷高貴等費用尙未過付馬得河卽於是晚在店因傷身死該縣捏報等情臣披閱之下不勝駭異查馬得河因遺漏丁糧被里差查出稟經該令牟尙仁票差傳訊該役高廷貴旣將馬得河尋獲自應稟官查訊彼此揪扭容或有之馬得河又何敢將票扯損顯係該役故爲扯票圖詐復捏以馬得河逞刁扯票向管

門家人李四告知尤屬有心誣賴無怪馬得河不服爭辯迨該令聽聞出訊自應查究虛實乃置差役扯票誣賴情節於不究直以隱昧丁糧酷刑濫責及至被責傷重皂役尙有不忍之心稟求領出赴店調息而該令仍連次提署鎖押致斃其命實出情理之外似此酷虐之員斷難姑容至里長馬報均勒索固干法紀而所稱托送門丁李四贓錢未收亦必係已經入手因馬得河傷斃始行吐出將來亦不能聽其狡賴至寄存李本寬處之贓既爲開發戶書差役之用何以又稱尙未過付以上

情節均屬不確尤難保無該令知情故縱情事或
贓數竟不止此必須一一研究方可水落石出茲
據藩臬兩司及該管道州揭報前來相應據實叅
奏請

旨將秦安縣知縣牟尙仁革職以便委員檢驗提同案內
人証逐一嚴審定擬以儆官邪並委員前往摘印
署理查明該員倉庫錢糧有無虧短另辦謹

奏

嘉慶十七年十一月二十二日奉

旨這所叅酷刑斃命並失察家人書役藉端勒索之秦安

縣知縣牟尙仁著革職交邢彥成提集案內人証並委員檢驗明確嚴審定擬具奏

嘉慶十八年正月二十七日

奏爲遵

旨審明定擬恭摺覆奏事竊臣參奏秦安縣知縣牟尙仁

酷刑致斃人命並失察家人書役藉端勒索一案

奉

旨牟尙仁著革職交臣提集案內人証並委員檢驗明確

嚴審定擬具奏欽此除馬得河屍軀業經委員清水縣

知縣程際韶檢驗實係受杖身死填格稟報在卷

當卽嚴提牟尙仁及全案人証解省審辦茲據署
藩司德克精阿署臬司嚴煇督同委員蘭州府知
府黃方階州直隸州知州普寶審擬招解前來

臣

親提覆鞫緣馬得河籍隸秦安縣嘉慶二年馬得
河用價錢五千五百文買獲王正祥地六垧額糧
九合隨於次年將糧過與伊三子馬興財名下迨
至嘉慶五年馬興財亡故馬得河卽將此糧隱漏
未納經隴五甲里長馬奉瀧等查知向馬得河催
納馬得河不認馬奉瀧卽以馬得河隱匿額糧九
合歷係里長賠納等情稟經該叅令牟尙仁批令

糧差高廷貴查稟屬實卽票差該役傳訊八月十
九日高廷貴持票傳馬得河投訊馬得河接看差
票聲言並未遺糧不肯投審高廷貴因其不服喚
訊卽扭住胸衣奪取差票不期將票扯破高廷貴
慮及自己受責卽將馬得河拉至縣署向管門家
人李四卽李通捏說馬得河抗不赴案扯破硃票
李通令其具稟候示高廷貴正欲寫稟馬得河以
高廷貴自行扯損不應誣賴互相爭吵經該叅令
牟尙仁聽聞吵嚷查詢李通卽將前情回明該叅
令傳審訊之馬得河不認隱糧扯票該叅令隨弔

紅簿質訊馬得河不肯承認該叅令因卽掌責三十馬得河不服恃老撒蠻堅不承認該叅令又用竹篋小板責問板五十馬得河始行承認隱糧屬實該叅令因其欺隱田糧例應問罪又令杖責二十時已天晚諭令原差押令同里長算賬交還糧錢聽候追田入官其扯票之事另行審訊馬得河隨央求壯役安花皂役馮祿稟求保領該役等卽以馬得河年老受刑署內無處住宿當向李通告知懇求該叅令保領在店歇息李通回明該叅令准保至二十二十一兩日該叅令仍將馬得河連

次提案與高廷貴質訊互相抵賴尙未審結二十一日馬得河之子馬保財因父刑傷頗重連日拖累不能養傷隨託素識之縣民王近士轉囑該縣管門家人李通稟懇本官保令調治又央壯役李木寬託該管書役從中照應均許酬謝迨二十二日早該叅令仍提馬得河到案候審經門丁李通以馬得河刑傷頗重伊子馬保財懇求保領調治俟傷痊送案候訊等語向該叅令稟知該令查驗傷重准令保領是日午間馬保財在店宰羊備席邀里長馬報均書役馮開基高廷貴並王近士李

本寬等至店酬謝並清算賠糧數目馬保財隨向
王廷章當舖借制錢十五千文與馬報均大錢四
千文當卽收受又與李本寬錢三千文託其轉給
戶書馮開基差役高廷貴分用又與王近士大錢
八千文內與李通送大錢六千四百文餘錢一千
六百文令王近士收用李本寬因馮開基高連貴
俱已回家未經交給王近士持錢六千四百文與
李通致送酬謝李通因聞馬得河刑傷甚重慮有
干係未敢接收王近士亦不收受二十二日下晚
當將其錢還交不期馬得河已於是晚因傷殞命

馬保財不肯收回王近士將錢送至王廷章當舖
謊稱馬保財令其送還王姓將錢收受馬報均李
本寬因馬得河已死亦各將已收錢文先後送還
馬有財查收時有馬有財堂弟馬成倫聞知馬得
河身故赴店看視詢明情由當同馬保財稟縣經
該叅令斥其逞刁馬有財卽寫呈稿令馬成倫赴
省呈控其時該叅令因馬得河杖後身死例應迴
避當卽稟請委員驗訊經秦州直隸州李受會查
知先行稟揭旋據馬成倫具控到轅臣據情叅奏
遵

自親提研訊各供前情不諱恐有故勘及得贓不實不盡
知情故縱情弊反覆究詰各供如一案無遁飾查
律載官司決人不如法因而致死者杖一百追埋
葬銀一十兩刑杖之人各減一等又文武官犯罪
杖一百降四絳調用又凡有事先不許財事過之
後而受財事不枉斷者准不枉法論又例載凡有
以財行求及說事過錢者審實皆計所與之贓與
受財人同科無祿人各減一等又例載不枉法贓
一兩至一十兩杖七十又例載竊役索詐計贓一
兩至五兩杖一百加枷號一個月又例載將自己

田地應納錢糧灑派別戶者計贓以枉法論田地
入官又律載誣告人杖罪者加所誣罪三等又律
載斷罪無正條者援引比附定擬各等語此案叅
革秦安縣知縣牟尙仁因馬得河隱漏田糧輒行
拷訊責至嘴掌三十杖板七十以致馬得河因傷
身死合依官司決人不如法因而致死律杖一百
追埋葬銀十兩給付屍親收領惟該叅員只因九
合之糧將六十餘歲之人重責至九十之多且皂
役稟求保領尙有不忍之心該員仍復連次提審
鎖押因傷拖斃致屍子許與該縣家丁書役酬謝

保領養傷因而以財行求雖訊無故勘故縱通同受賄等事其情已屬酷暴若僅照例調降不足以儆懲虐吏應請

旨發往伊犁効力贖罪以昭炯戒行杖之皂役王天祿汪自法各依本例減一等杖九十折責革役門丁李通因聽王近士說合許以酬謝稟官准保而於事後經王近士給與制錢六千四百文雖因馬得河傷重畏累退還已貪其謝資允情稟保未便因其贓未入手稍滋輕縱李通一犯仍應照不枉法贓一兩至十兩杖七十律杖七十折責遞籍馬保財

以財行求王近士說事過錢均應計贓與受財人同科馬保財除與書役等錢文均在一兩以上不計外應與說事過付之王近士均照不枉法律杖七十係無祿人應減一等各杖六十折責發落王近士年逾七十照律收贖戶書馮開基雖不知馬保財以錢酬謝但已允爲照應貪其哺啜應與囑託該書役並未過錢之壯役李本寬均照不應輕律笞四十折責革役糧差高廷貴因馬得河看票不認遺糧卽恃役逞忿撕扭奪損硃票捏稱馬得河抗傳扯票始終誣執以致馬得河於杖後屢因

提審拖累由伊起與尋常誣告不同查撕破信
牌應比依毀官文書律杖一百高廷貴應於杖罪
上加所誣罪三等律再加二等擬以杖一百徒三
年到配折責安置里長馬報均藉口於賠納遺糧
任意勒索制錢四千文除應得糧錢一百六十九
文外其餘計贓三兩有奇應照竄役索詐一兩至
五兩例杖一百加枷號一個月滿日折責革役照
例刺字馬得河將應完錢糧隱匿致令里長代完
多年卽與灑派別戶無異應計贓以枉法論田地
入官該犯業已身故應請免議且伊子馬有財等

均不知有隱糧情弊其田業經分授並免入官馬
報均馬奉灌應得歷年賠納糧錢一百六十餘文
應令馬有財照數給還所有馬保財給過家丁書
役里長等制錢十五千內除應給糧錢一百六十
九文外應向馬報均追出制錢三千八百八十一
文入官其餘制錢一十一千文雖據李通等均經
退還馬有財亦卽交還借主第係彼此俱罪之賊
例應入官仍應飭縣在於馬保財名下照數追出
入官馬有才令馬成倫控詞失實雖有不合但係
痛父情切且伊父已死非命應請從寬免議馬保

財現在患病應俟病痊飭縣提案照擬發落遺糧
九合更正過割完納安花馮祿聽從馬得河央求
轉稟本官保領到店歇宿訛無受賄情事尙無不
合應免置議無干省釋謹

奏奉

硃批該部議奏

嘉慶十八年五月初四日

奏爲特叅昏庸殘酷擅用非刑之知縣請

旨革審以肅

功令事竊照知縣一官身膺民牧凡遇審理案件不得

任性濫刑至於治家尤宜嚴肅慈祥方爲無忝厥職詎玉門縣知縣陳周書人雖少有才具惟性情躁妄遇事多疑茲據署安西直隸州事伏羌縣知縣楊毓錦稟稱訪聞得嘉慶十七年六月間玉門縣知縣陳周書因伊妾韓氏私令僱工謝高氏打卦問病書旃禳災該縣聞知疑有咒詛情事當將牽連之民人石璞等妄行責打管押又將謝高氏押責追究以致伊妾韓氏畏懼於六月二十六日自縊身死又因家人宋高偷竊署內布衫等物查獲於九月十五十八等日將宋高迭次堂訊掌嘴

擊背杖責跪練並用木棒敲打腳踝宋高受刑不過情急自用小刀扎傷肚腹殞命等情前來臣披閱之下不勝駭異當經飭司委員前往驗訊屬實查該縣陳周書之妾韓氏書旂禳病是該令平素無家教又復遷怒於無辜之石璞史尙志謝功蘭妄加責打並混行管押實屬昏憤糊塗家人宋高既經犯竊自應治以應得之罪乃該令輒復迭次責打並跪練擊背敲踝是因家事而動用官法且係非刑以致宋高情迫自戕更屬殘酷關係二命其中或不無別故自應革審以期無枉無縱現據

藩臬兩司及該管道州揭報前來相應據實叅奏

請

旨將玉門縣知縣陳周書革職以便提同案內人証嚴審
有無起衅別故按律定擬以儆官邪茲已委員前
往摘印署理查明該員倉庫錢糧有無虧短另辦
謹

奏奉

旨這所叅酷刑斃命之玉門縣知縣陳周書著革職交那
彥成提同案內人証嚴審確情按律定擬具奏

嘉慶十八年七月十六日

奏爲遵

旨審擬覆

奏事竊臣叅奏玉門縣知縣陳周書因妾韓氏書僱讓

病刑及無辜韓氏自縊又責打行竊之家人朱高

致令自戕一案奉

旨革職嚴審隨飭司移行安肅道同福督同署安西州知

州楊毓錦親往驗訖一面提齊人証解省委員蘭

州府知府黃方臯蘭縣知縣李醇和環縣知縣孫

錢等審擬招解由署臬司嚴煇勘轉前來臣親提

覆鞫緣該革員陳周書之妾韓氏於上年三月內

在署患病遣令僱工婦人謝高氏向星士閻貴占卜閻貴圖得錢文聲稱須在神前獻幡並用黃紙書寫男婦年庚方可愈病謝高氏告知韓氏應允給子制錢九百五十九文買備一切謝高氏隨央隣人石璞買就香燭幡布黃紙鷄酒等項用錢四百文又浼王惟漢史尙志代書幡紙各給錢十五文將供獻等物送交閻貴并酬謝錢五百文韓氏之病漸愈六月二十日韓氏與謝高氏在房間談共稱祈禳有靈被該革員聽聞盤問究出前情心疑禳病書幡卽係師巫邪術治家不嚴何以禁止

百姓且擅書本官年庚必有咒詛情事當傳石璞等問明將石璞史尙志各責五板王維漢責打十板獨貴責打二十板謝高氏掌嘴二十仍恐咒詛情實又傳謝高氏之夫謝功蘭詛不知情當卽一併管押聽候覆訊詎韓氏聞知愧懼卽於二十六日午間自縊身死至家人宋高係該革員同鄉在署跟班年久十七年七月內縣署失去洗曬布衫一件五月內又失銀三十八兩燕窩二兩十五日該革員搜檢至宋高房內查出零星燕窩一包捉訊宋高不認隨令皂役王孝掌嘴二十鞭責脊背

十下因其頂撞又責十六板取出零星燕窩高質訊
朱高始行承認並供止竊用銀二兩十八日又復
翻供該革員生氣令茶房邵進才用戒方責打手
掌三十並令跪練宋高始認燕窩已經喫用餘剩
無多並竊用銀三十八兩花銷無存又供出七月
間曾竊內省洗曬布衫一件向典舖質錢二百五
十文查起實係原贓該革員以宋高係同鄉親近
之人服役年久輒敢偷竊主人財物一時氣忿又
令皂役王孝掌責嘴四十并用木棍敲打腳踝五
下聲言遞解回籍詎宋高心生愧懼突然立起順

取書架小刀揭衣自扎肚腹倒地聲喚縣役等救
阻不及該革員飭令抬出大門移時殞命由州訪
聞詳報經飭該道州驗明韓氏實係自縊宋高實
係自戕并驗得宋高右腮腴右手掌左右膝蓋脊
背左右臂下左脚外踝等處生前鞭打杖責棒傷
及跪練各傷痕均不致命案經奉

旨革審

臣

嚴加鞫訊各供前情不諱似無遁飾查律載夫

毆罵妻妾因而自盡身死者勿論又官司決人不
如法者笞四十行杖之人各減一等又竊盜已行
但得財者以一主爲重并賊論罪四十兩杖一百

又制書有違杖一百又名例載文武官犯私罪該杖一百革職離任各等語此案叅革知縣陳周書因妾韓氏禳病獻楮書寫男婦年庚疑其咒詛輒將石璞史尙志王維漢閻貴等訊責管押又將謝高氏掌責以致韓氏畏懼自縊身死在韓氏死由自盡律得勿論卽石璞等被責亦屬咎由自取惟將謝高氏掌責屬決不如法依律應笞四十至家丁宋高以同鄉久隨跟役雖非契買家奴實與僱工無異及因其犯竊並不用家法處治輒用官法杖臂掌嘴兼之跪練擊背敲踝復聲言遞解回

籍以致宋高情急自戕實屬任性妄爲查宋高究係自戕身死並非由於該革員之刑斃第擊背敲踝等項均干例禁且以家事而動用官法尤屬違制已革知縣陳用書除決不如法輕罪不議外自應照違

制律杖一百係私罪業經革職應毋庸議閭貴以星士卜卦訛無不法別情其圖騙婦女供獻錢物殊屬不合謝高氏聽從已死韓氏妄爲禳病石璞等代買供獻物件王維漢等代書牒紙均經該革員分別賣處應免重科皂役王孝茶房邵進才均照律

答三十折賣十板係本官指使免其革役宋高倫
竊銀兩燕窩布衫共計贓四十兩應杖一百業已
身死應免置議著追王維漢閻貴史尙志所得錢
文均經該革員追入仍令入官無干省釋謹

奏奉

硃批刑部知道

嘉慶十七年正月初三日

奏爲現任水利同知才不勝任請

旨撤回改用京職事竊照宣夏府水利同知一缺專管渠
工事務每年春濬督民夫修理渠道及查勘工程

按期放水事關全郡民田所係自重且該處渠工
年久淤墊業經臣具奏請

旨借項大修同知專司水利若不得其人卽恐辦理貽悞
茲查現任同知茹式係屬短視辦事遲鈍本非開
展之才於督率稽查俱不能得力卽使將來學習
未必有望臣與署藩臬兩司商酌不敢拘泥謹據
實奏明請

旨將現任寧夏府水利同知茹式撤回改用京職所遺員
缺應歸部另行銓選但該處渠工今歲正值大修
之時錢糧旣多關係緊要必得熟悉地方情形才

守可信之員方可勝任部選人員恐初任究未諳
練合無仰懇

聖恩俯准

臣

另行遴員請補務期才可稱職於水利農田

庶有裨益

臣

爲渠工緊要起見不揣冒昧理合謹

奏

嘉慶十七年正月二十三日奉

上諭那彥成奏寧夏府水利同知一缺專管渠工爲全郡
民田水利所繫現任同知茹式辦事遲鈍請改用京職
等語著撤回京職改補至所遺同知一缺該督奏稱恐
初任之員未能諳練懇請在外遴員奏補殊屬非是寧

夏府同知本係選缺若由外省揀補殊於銓政有礙所
奏不準行仍著吏部照例銓選

嘉慶十七年三月初十日

奏爲坐補原缺之道員精力就衰據實

奏明請

旨事竊查鎮迪道寶陞年六十四歲正白旗滿洲阿彌爾
達佐領下人由官學生考取內閣中書補授太僕
寺主事游陞大通橋監督

京察一等記名嘉慶十年奉

旨補授甘肅鞏秦階道十三年奏調鎮迪道未經赴任旋

以染患目疾兼之腿受風濕行走不便呈准回旗
調理病痊由部引

見奉

旨照例用於本年二月到省例應坐補原缺該員到甘之

後臣接見司道時該員日日與之同見因節次留

心驗看該員人尙樸實惟目係短視步履維艱詢

以地方公事應對多不明晰其才具實屬庸伏

查道員職任監司非精明幹練之員難以勝任况

鎮迤道一缺地處新疆係衝繁難三項相兼爲邊

疆最要之缺該道衙門總理刑名錢穀案件政務

殷繁實兼內地藩臬兩司之事責成綦重若令該員屆期坐補必致闕葺廢事於新疆地方殊有關係臣驗看既真斷不敢因係奉

旨坐補之員拘泥補用若俟其到任後再行撤回則口外距省迢迢迨至遴員吏調彼時業已貽悞不得不預行籌維據實具

奏查寶陞履歷册開現年雖僅止六十四歲其精力業已就衰難期振作相應請

旨或勒令休致或該員不甘廢棄仍歸吏部帶領引見之處出自

聖裁 臣仰體

聖主用人行政至意爲邊疆要地斷不敢稍事姑容謹繕

摺奏

聞謹

奏

嘉慶十七年三月二十五日奉

上諭那彥成奏稱病痊坐補原缺道員寶陞精力就衰難
期振作將來坐補鎮迪道時於邊疆要務恐致貽誤等
語寶陞查來京交吏部帶領引見再降諭旨

嘉慶十七年五月二十九日

奏爲知府才不勝任請

旨降用同知事竊查現任甘州府知府閻學諫年六十歲

山東舉人由捐納主事洊陞郎中

京察一等俸滿保送引

見奉

旨交部記名以繁缺知府用嘉慶八年奏補今職上年因

七年俸滿由部調取引

見奉

旨留任於本年正月到省臣查得該員年力尙健惟平日

識見短淺辦事遲鈍才具並不開展甘州爲西路

衝途從前民情樸實尙屬易治近則獄訟漸繁刁風漸長知府爲方面大員若非表率屬員振作有爲不足以資整飭今閩學涑雖無別項劣蹟似此庸才於衝途知府斷難勝任臣不敢因給咨引

見於前稍存遷就貽悞地方現與藩臬兩司商酌相同理合據實奏明請

旨將現任甘州府知府閻學涑降用同知留甘另補所遺甘州府知府員缺係衝繁難三項要缺相應請

旨簡放以重地方謹

奏奉

硃批照所請行吏部知道

刑部彙考卷二十七